

Gion Aluis Hendry-Loretz, Sedrun/Bugnei

(Corr.) Cu ei tucca da miert vegnin nus surpri da sentiments da tristezia e melanconia. Nus vegnin per tscharts ch'in carstgaun ha banduau nus per adina. Ei quella persona aunc ella flurizun dalla veta sco il Gion Aluis Hendry e leutier aunc in bien amitg, sche sesentin nus sco sche nus havessen piars enzatgei agen. Ina greva cozza da tristezia ei serasada sur la Val Tujetsch.

Il Gion Aluis ei naschius ils 11 da decembre 1946 a Cavorgia sco tschunavel da siat affons dils geniturs Aluis Hendry e Rosa Martina Monn. Ensemens cun ses fargliuns e tut la buobanaglia che habitava da gliez temps a Cavorgia ha el passentau ina ventireivila affonza en in temps che tut profitava dil svilup economic. Aschia eis el serendius suenter las scolas primaras a Cavorgia e las secundaras a Camischolas giu Cuera per far leu igl emprendissadi da dessignader. Duront quei temps che pretendea tut dad in giuven miera sia buna mumma che era per el adina in grond sustegn.

Suenter igl emprendissadi ei il Gion Aluis turnaus ella biala Val Tujetsch, secasaus cun siu bab a Bugnei ed ha surviu a differents patruns dalla Val tochen siu davos di. Entras siu dun special da dessignader e bien organisatur han ses patruns e conlurvrs saviu profitar dallas ideas messas a scret, aschia ch'ei era lev da luvrar cun ses plans e sias skizzas. Schegie ch'el luvrava en biro era siu patertgar insumma buca ab-



stracts, mobein fetg concrets. El saveva era metter sez maun vid lavurs pli diras.

Ils 28 da zercladur 1980 ha Gion Aluis menau la giuvna Annalise Loretz da Sedrun agl altar da nozzas. Ils dus affons, Pieder e Carla, eran pil bab l'entira luschezia. Co era el selegraus, an-nunziond a nus, ch'il Pieder vegni a cuntinuar sia scolaziun a Mustér en Claustra. E co selegrava el, sco passiunau catschadur, da saver prender siu fegl quest atun silla catscha. Pertgei ha quei buca duiu esser? Ei quei il destin?

Pil beinstar da sia famiglia ha il Gion Aluis mai schau muncar la carezia e buontad. Cun gronda pazienza e capientzha ha el baghegiau entuorn igl onn vargau sia habitaziun, dalla quala el fuva cun raschun loschs. Mo el ha buca

saviu guder ditg ella. Il Segner ha regalaui ad el in auter dacasa, in'avdonia celestia e perpetna en siu reginavel.

Tgi che ei staus cul Gion Aluis en in'uniun ni societad ha saviu seperschuader, ch'el era buca semplamein in commember pli u meins activ. El ha adina puspei mess a disposiziun sias forzas e savida sco suprastont e quei il bia sco president. Aschia eis el staus president dil Cussegli da vischnaunca, cumandant da pumpiers e commember dil cussegli d'administraziun dallas pendicularas. Mo dasperas eis el era segidau exemplaricamein culs uclauns pli pigns. Aschia era el president dallas corporaziuns d'aua da Bugnei e Cavorgia. Ils tiradurs e catschadurs han buca mo profitau da sias forzas sco president, il stan da sittar dils tiradurs ei naschius per gronda part sut sia plema e bitgetta. Era ils catschadurs quintavan cun sia savida ed havevan eligiu el sco commember ella cumissiun dil niev stan da sittar. Aunc la sera avon sia nunspitgada mort, haveva el mess a scret ina impurtonta decisiun. Sch'el prendeva zatgei enta maun, sch'exequeva el quell'incumbensa buca per agen profit, sia emprema devisa era il beingartegiar dil project. Per tut Tias lavurs prestadas, per las bialas uras che nus havein passentau cun Tei e per tut Tes buns cusssegli engraziein da cor.

Ils 22 da fenadur ha la populaziun tuatschina priu cumiau d'in ordvert atta-schau vischin. Nus vegnin a tener Tei en buna memoria e la glisch perpetna sclareschi a Ti. Alla famiglia en malencurada sincera condolientscha.